



Sesida dals

Communitgà ils

Protocol nr.

27 d'avust 2019

28 d'avust 2019

638

Dumonda Rutishauser

concernent la garanzia d'in dumber sufficient da plazzas da praticum per tgirunzas e tgirunzs en scolaziun

Resposta da la regenza

Sco emprim stoi vegnir menziunà che betg mo ils ospitals, mabain – sin basa da l'art. 19 al. 1 lit. b e da l'art. 22 al. 1 lit. b da l'ordinaziun tar la lescha da sanadad (OtLSan; DG 500.010) – er las chasas da persunas attempadas e da tgira sco er ils servetschs da spitex èn obligads tenor lescha da metter a disposiziun plazzas da praticum. Quai correspunda a las directivas federalas dal plan d'instrucziun che pretendan ina vasta scolaziun generala dad SSS-tgira. Ils ultims onns n'han las plazzas da praticum messas a disposiziun dals furniturs da prestaziuns per il solit betg pudì vegnir occupadas (chasas da persunas attempadas e da tgira, spitex) u mo per part (ospitals).

Tar la dumonda 1: La mancanza da persunal da tgira ha differents motivs. En spezial la diminuziun marcanta da las naschientschas, il curt temp d'activitad en la medema professiun dal persunal da tgira scolà, las cundiziuns da lavur sco er la reputaziun da la professiun da tgirunza e tgirunz han ina influenza. Qua èn dumandads betg sco ultim ils furniturs da prestaziuns da prender cuntramesiras. La regenza sustegna las stentas da la confederaziun da rinforzar l'agir da las tgirunzas e dals tgirunzs en atgna responsabladad e confirm a las cumpetenzas, e spera d'augmentar uschia l'attractivitat da las professiuns en il sector da la tgira. Perquai che las studentas ed ils students prefereschon praticums en ospitals, n'han las plazzas da praticum en la tgira ambulanta e staziunara betg pudì vegnir occupadas ils ultims onns. La planisaziun e l'organisaziun da las plazzas da praticum vegn actualmain surpigliada dal center da furnaziun per la sanadad ed ils fatgs socials (CSS). Pervia da quai vegnan las plazzas da praticum organisadas oz oravant tut en il senn da la scola, entant ch'ils manaschis da scolaziun vegnan per gronda part exclus da la responsabladad. Sche las plazzas da praticum vegnan messas a disposiziun dals manaschis, dentant betg occupadas tras il CSS, na po il chantun betg scursanir las contribuziuns. La pussaivladad dals manaschis d'engaschar dapi paucs onns directamain las studentas ed ils

students da la scola spezialisada superiura n'ha betg meglierà la situaziun, perquai ch'igl è resultada tras quai ina situaziun da concorrenza tranter la scola ed ils manaschis. Pervia da la situaziun tut en tut nuncuntentivla ha la regenza decidì d'examinar e sche necessari d'adattar il sistem actual da la scolaziun da tgira a la scola spezialisada superiura. Examinar ston ins en spezial, sch'ils manaschis pudessan vegnir obligads da surpigliar dapli responsabladad cun prescriber ch'els stoppian recrutar ed engaschar sezs las studentas ed ils students. Il sistem da l'engaschament tras ils manaschis è sa cumprovà en numerus auters chantuns (BL, BS, LU, NW, OW, SG, SO, SZ, UR, ZG). Examinar ston ins er flexibilisaziuns sco er l'introducziun da dus termin da cumenzament da studi per onn.

Tar la dumonda 2: La regenza oblighescha gia dapi intgins onns las chasas da persunas attempadas e da tgira sco er ils servetschs da spitex da metter a disposiziun avunda plazzas da praticum (cf. introducziun).

Tar la dumonda 3: La qualitad da la scolaziun en il sector da las scolas spezialisadas superiuras vegn garantida tras las prescripziuns minimalas da la confederaziun (OPM-SSS) e tras il plan d'instrucziun federal general (PIG) SSS. Confurm a questas prescripziuns è il CSS certitgà dapi onns, e ses studi SSS-tgira è renconuschì da la confederaziun. Ils manaschis da scolaziun ston sa suttametter periodicamain a proceduras da qualificaziun externas per garantir a lunga vista la qualitad da lur scolaziun. Ord vista da la regenza èsi indispensabel ch'i stettia adina a disposiziun persunal da scolaziun professiunalmain e socialmain cumpetent tant en l'instituziun da furmaziun sco er en ils manaschis da scolaziun. Quai pretenda investiziuns permanentas en la furmaziun supplementara da questas persunas respectivamain en la promozion da la generaziun giuvna.

Tar la dumonda 4: Als manaschis pitschens recumonda la regenza d'ademplir l'incumbensa da scolaziun en collavuraziun cun auters manaschis. Er la fusiun ad in center da sanadad simplifitgescha als manaschis d'ademplir l'incumbensa da scolaziun. Ultra da quai pon vegnir purschidas uschia plazzas da praticum pli interessantas e vegnir promovida la direcziun generalistica da la scolaziun SSS-tgira.



En num da la Regenza

Il president:

Il chancelier:

Dr. Jon Domenic Parolini

Daniel Spadin